

## AKHBAR : UTUSAN MALAYSIA

## Misi tarik pelabur tumpu lima sektor

**Shah Alam:** Invest Selangor Berhad (Invest Selangor), agensi promosi pelaburan negeri Selangor mengadakan misi perdagangan di Jakarta, baru-baru ini bertujuan menarik kerjasama pelaburan daripada pelabur Indonesia dalam lima sektor pertumbuhan teras.

Lima sektor pertumbuhan tinggi itu adalah elektrik dan elektronik, kelengkapan pengangkutan, sains hayat, makanan dan minuman, jentera dan peralatan sebagai pemacu pelaburan masa depan untuk mengekalkan pertumbuhan ekonominya.

Ketua Pegawai Eksekutif Invest Selangor, Hasan Azhari Idris berkata, walaupun hubungan baik antara Indonesia dan Malaysia, pelaburan Indonesia di Selangor masih lagi rendah.

“Misi perdagangan ini bertujuan mempromosikan peluang pelaburan di Selangor khususnya dalam kalangan perusahaan kecil dan sederhana (PKS) di Indonesia,” katanya dalam kenyaataan di sini, semalam.

Beliau berkata, sejak 1987, kira-kira 36 projek pembuatan dari Indonesia diluluskan di Selangor dengan

jumlah pelaburan RM408.35 juta, mewujudkan 4,259 peluang pekerjaan dengan kebanyakan daripada pelaburan ini adalah dalam pembuatan makanan, minuman dan kosmetik.

“Saya ingin menggalakkan PKS Indonesia melabur di negeri ini kerana Selangor menyediakan pengecualian cukai insentif sehingga lima tahun dalam lima sektor berkenaan,” katanya.

Antara aktiviti diadakan ketika misi perdagangan itu adalah satu seminar di SMESCO (Lembaga Layanan Pemasaran Koperasi dan

Usaha Kecil Menengah) yang dihadiri 200 usahawan Indonesia, sesi dialog dengan usahawan dari KADIN (Kamar Dagang dan Industri Indonesia) dan mesyuarat dengan Pengarah Kementerian Koperasi & Usaha Kecil Menengah (KUKM Indonesia).

Misi perdagangan itu turut menggalakkan pelabur Indonesia mengambil bahagian dalam Ekspo Antarabangsa Selangor yang kedua, dijadualkan pada 20 hingga 22 Oktober tahun ini di Pusat Pameran dan Konvensyen Antarabangsa Mines (MIECC) di Seri Kembangan.

AKHBAR : UTUSAN MALAYSIA



**Penampilan pertama Tengku Permaisuri Norashikin**

**JADI TUMPUAN...** Sultan Selangor, Sultan Sharafuddin Idris Shah bersama Tengku Permaisuri Norashikin berangkat menunaikan solat sunat Aidiladha di Masjid Diraja Tengku Ampuan Jemaah, Bukit Jelutong, Shah Alam, Selangor, semalam.

# Tengku Permaisuri Norashikin jadi tumpuan

Oleh FAZRINA AYU RADUIAN

pengarang@utusan.com

■ SHAH ALAM 12 SEPT.

**P**ENAMPILAN sulung Tengku Permaisuri Selangor, Norashikin Abdul Rahman di khalyak ramai selepas dimasyurkan pada 8 September lalu di Masjid Diraja Tengku Ampuan Jemaah, Bukit Jelutong, di sini untuk menunaikan solat sunat Aidiladha menuri tumpuan jemaah yang hadir.

Tengku Permaisuri Norashikin yang tiba bersama Sultan Selangor, Sultan Sharafuddin Idris Shah di masjid berkenaan kira-kira pukul 8.20 pagi kelihatan anggun dengan jubah dan selendang berwarna hitam.

Wajahnya yang sentiasa menguntum senyuman membuatkan ramai yang tidak melepaskan peluang merakamkan gambarnya.

Sementara itu, kira-kira 4,000 jemaah menunaikan solat sunat Aidiladha di masjid tersebut yang diimamkan oleh Imam Masjid Sultan Salahuddin Abdul Aziz Shah, Sheikh Abdul Karim Omar

Yang turut hadir ialah Menteri Besar, Datuk Seri Mohamed Azmin Ali; Setiausaha Kerajaan Negeri, Datuk Mohd. Amin Ahmad Ahya dan Mufti Selangor, Datuk Seri Mohd. Tamyas Abdul Wahid.

Jumaat lalu, Setiausaha Dewan Diraja Selangor, Hanafisah Jais mengumumkan pemasyuran

gelaran Norashikin sebagai Tengku Permaisuri Selangor berkuat kuasa 8 September lalu setelah mendapat perkenan Sultan Sharafuddin.

Selain pemasyuran gelaran Tengku Permaisuri Selangor, baginda turut berkenan mengurniakan anugerah Darjah Kebesaran

Seri Paduka Mahkota Selangor (SPMS) yang membawa gelaran Datin Paduka Seri kepada Tengku Permaisuri Norashikin.

Pada 31 Ogos lalu, Sultan Sharafuddin, 71, melangsungkan pernikahan dengan Tengku Permaisuri Norashikin, 45, dalam satu majlis yang diadakan secara ringkas dan sederhana di Masjid Istana Diraja, Istana Alam Shah, Klang.



SULTAN SHARAFUDDIN IDRIS SHAH dan Tengku Permaisuri Norashikin berkenan menghadiri santapan selepas menunaikan solat sunat Aidiladha bersama rakyat di Masjid Tengku Ampuan Jemaah, Bukit Jelutong, Selangor, semalam. - BERNAMA